

Tesco beroperasi di Bandar Universiti

KUALA LUMPUR 5 Dis. - Hua Yang Bhd. (Hua Yang), pemaju perbandaran Bandar Universiti di Seri Iskandar, Perak telah menerima pelaburan baharu daripada pengendali pasar raya besar, Tesco yang memilih untuk beroperasi di sana.

Tesco akan membuka pasar raya besar dengan keluasan kasar sebanyak 7,432.2 meter persegi yang mewakili pembukaan yang ke 45 di negara ini.

Hua Yang dalam kenyataan di sini berkata, Tesco percaya operasi baharu itu akan dapat menarik pelanggan dari Bandar Universiti Seri Iskandar serta kawasan-kawasan sekitar.

Ketua Pegawai Eksekutif Hua Yang, Ho Wen Yan berkata, Tesco terletak di lokasi strategik di OneBU@Seri Iskandar yang merupakan pusat gaya hidup dan perniagaan di dalam Bandar Universiti, Seri Iskandar.

Katanya, ia pasti akan menarik keluarga dan orang individu untuk melawat perbandaran ini untuk membeli barang-barang runcit, ma-

kanan segar dan keperluan rumah.

"Tesco yang akan dibuka itu juga akan memenuhi keperluan 10,000 penduduk sedia ada yang bertambah dengan cepat.

"Kami mempunyai rancangan besar bagi perbandaran ini dan akan membuat suatu pengumuman tidak lama lagi. Sehingga kini, kami mempunyai jualan yang cergas bagi fasa terbaru iaitu siri Selinsing dan Lily yang telah pun habis dijual," katanya.

Tambah Wen Yan, sebanyak 200 buah kedai Bandar Universiti Business Center (BUBC) telah habis dibeli oleh peniaga.

"Berdasarkan penyelidikan kami, ramai individu dan keluarga yang tinggal di kawasan sekitar kini berpindah ke perbandaran ini kerana menyedari Bandar Universiti Seri Iskandar sedang berkembang menjadi suatu perbandaran mesra alam yang menyediakan kediaman berkualiti yang mampu milik," kata beliau.



TESCO bakal memiliki cawangan ke 45 di Seri Iskandar, Perak.